

Program Jelajah 64 Tahun Kemerdekaan 'Webinar Nostalgia 64 Tahun Kemerdekaan'



31 Ogos merupakan tarikh keramat di mana setiap tahun seluruh rakyat Malaysia meraikan sambutan Kemerdekaan Malaysia yang bebas daripada cengkaman penjajah. Tahun 2021 juga seperti tahun sebelumnya, sambutan kemerdekaan ke-64 disambut dengan norma baharu. Namun, norma baharu ini tidak menghalang Jabatan Warisan Negara (JWN) melaksanakan program Jelajah 64 Tahun Kemerdekaan yang diisi dengan pelbagai pengisian bagi menyambut Hari Merdeka.

Salah satu pengisian program tersebut adalah siri Webinar bertajuk 'Nostalgia 64 Tahun Kemerdekaan' yang telah diadakan secara maya. Webinar ini telah disiarkan pada 31 Ogos 2021, jam 10.00 pagi di laman facebook JWN. Para panelis yang terlibat dalam siri webinar ini merupakan tokoh yang tidak asing lagi dalam bidang sejarah dan sosio-budaya Malaysia. Barisan panelis jemputan yang telah diundang adalah YBhg. Prof. Datuk Dr. Danny Wong Tze Ken, Dekan Fakulti Sastera dan Sains Sosial, Universiti Malaya (UM), YBhg. Prof. Dato' Dr. Ahmad Murad Merican

dari Institut Antarabangsa Pemikiran dan Tamadun Islam, Universiti Islam Antarabangsa Malaysia (UIAM) dan YBhg. Prof. Madya Dr. Hafidzi bin Mohd. Nor, seorang pensyarah di Universiti Putra Malaysia (UPM) yang juga merupakan aktivis kemanusiaan. Sesi diskusi tersebut telah dikendalikan oleh YBrs. Encik Mohd. Azmi bin Mohd. Yusof, Ketua Pengarah JWN selaku moderator.

Bersesuaian dengan tarikh kemerdekaan, siri Webinar ini telah mengupas maksud dan manifestasi kemerdekaan itu sendiri. Antara topik perbincangan termasuklah mengenai peristiwa bersejarah sepanjang tempoh mencapai kemerdekaan, pengajaran dan kepentingan sejarah kepada generasi baru. Selain itu, perbincangan ini juga menjurus kepada isu semangat patriotisme serta perpaduan dalam kalangan rakyat Malaysia terutamanya di zaman lonjakan media sosial pada hari ini. Semoga dengan adanya perbincangan ilmiah ini, semangat cintakan negara dan keharmonian antara kaum yang mungkin kian luntur dapat dikembalikan dalam jiwa agar kemerdekaan yang telah dicapai selama 64 tahun ini terus dilestari.